

Radøy kommune

Saksframlegg

Saknr	Utval	Type	Dato
002/2017	Formannskapet i Radøy	PS	24.01.2017
004/2017	Kommunestyret i Radøy	PS	09.02.2017

Sakshandsamar	Arkivsaknr.:	Dokumentnr.:
Bente Kopperdal Hervik	16/2286	16/16100

Disponering av fondsmidler - årets nynorskkommune

Saksopplysingar:

Bakgrunn

Radøy kommune vart i 2014 kåra til årets nynorskkommune i Noreg. Prisen var eit maleri og i tillegg 100 000 kroner. Midlane vart avsett i ubunde fond i Radøy kommune, der bruken av midlane må godkjennast av kommunestyret.

Vurdering

Radøy kommune fekk prisen for årets nynorskkommune for målretta arbeid for å styrkja nynorsken si stilling i kommunen, og ikkje minst for at kommunen har vedtatt ein målbruksplan som legg føringar for korleis kommunen skal jobba med språket i kommunen. Rådmannen meiner det er naturleg at midlane som følgde prisen vert nytta for å løfta fram nynorsken i kommunen, og at bruken av midlane støttar opp om tiltaka i målbruksplanen.

Rådmannen ynskjer at følgjande målsetjingar vert lagt for bruk av midlane:

1. Radøy kommune skal ha ein tydeleg nynorsk profil.
2. Born og unge i kommunen skal få tilbod om nynorsk litteratur og scenekunst frå tidleg alder.
3. Dei tilsette i kommunen skal verta meir medvitne om og betre brukarar av nynorsk.

Ulike tiltak som kan støtta opp om dei målsetjingane som er skisserte ovanfor har vore drøfta. Mellom anna har ein sett på moglegheitene for nynorskkurs for alle tilsette i kommunen som eit tiltak for å heva kvaliteten på skriftleg materiale som går ut frå kommunen både i form av brev og på nettsider. Rådmannen har likevel landa ned på at eit slikt tiltak, med kursing av alle tilsette, vil vera for omfattande å gjennomføra med dei midlane ein har til rådvelde. I staden for kan opplæring og medvitngjering av dei tilsette skje gjennom andre typar tiltak.

Morgondagens nynorskbrukarar er dei som no er born og unge, og trykket frå bokmålet er sterkt, ikkje minst for desse aldersgruppene! Om born og unge skal velja å skriva nynorsk, er det viktig at dei møter nynorsken dagleg, og får ei positiv haldning til å bruka språk! Kulturelle opplevingar og tiltak som kan gjera at dei får eit positivt møte med nynorsk er tiltak rådmannen meiner bør prioriterast.

Rådmannen har følgjande forslag til bruk av midlane som følgde nynorskprisen:

Radøy kommune arrangerer «nynorskdagar» i 2017 og 2019, som er år der ein ikkje har kultur dagar. Rådmannen tenkjer nynorskdagar som nokre samanhengande dagar der ein set fokus på språk ved at ein samlar fleire arrangement og tiltak som fremjar nynorsken ut til innbyggjarane og blant dei tilsette i kommunen. Rådmannen foreslår at ein set av kr 50 000 til nynorskdagar i 2017. Ei eventuell løyving til nynorskdagar i 2019 kan koma som eiga politisk sak i det budsjettåret.

Ved å samla fleire arrangement og tiltak innanfor eit kort tidsrom, vil ein kunna få eit sterkare fokus og betre marknadsføring enn ein vil få gjennom fleire aktivitetar og tiltak som er spreidde utover i tid. Nynorskdagar vil også vera mogleg å gjennomføra utan å bruka for mykje administrative ressursar.

Kulturgruppa tenkjer ei todeling av nynorskdagane:

1. Tiltak og aktivitetar retta mot alle innbyggjarane og alle aldrar, men med særleg vekt på born og unge. Aktuelle tiltak er t.d. skrivekonkurranse for ungdom, forfatterbesøk i ungdomsskulen, teaterforestilling for dei minste borna og innkjøp av nynorskbøker til biblioteket. Kommunen kan i tillegg ta kontakt med lag og organisasjonar og oppfordra dei til å ha arrangement eller gjennomføra tiltak som handlar om språk.

2. Tiltak og aktivitetar retta mot dei tilsette i Radøy kommune: Aktuelle tiltak kan vera foredrag, tilbod om vurdering av tekstar, profilering av nynorsk på intranett og gjennom trykksaker som kan delast ut til dei tilsette og hengast opp på avdelingane, og gjennom at leiarane set ekstra fokus på nynorsk i sitt tenesteområde desse dagane.

Rådmannen ser ikkje for seg at arrangementet skal koma opp mot kultur dagane i lengd og omfang.

Konklusjon

Rådmannen meiner at prisen kommunen fekk som årets nynorsk kommune i 2014 bør brukast til tiltak som fremjar nynorsk i kommunen, og foreslår å arrangera nynorskdagar i 2017 og 2019 som set ekstra fokus på nynorsk blant dei tilsette og ut til innbyggjarane, med særleg vekt på born og unge.

Rådmannen sitt framlegg til vedtak:

Radøy kommune set av kroner 50 000 til gjennomføring av nynorskdagar i 2017. Midlane vert henta frå disposisjonsfond merka nynorskmidlar.

Løyving til nynorskdagar i 2019 kjem opp som ei eiga sak i budsjettåret 2019.

Formannskapet i Radøy - 002/2017

FS - handsaming:

Formannskapet vedtok samrøystes rådmannen sitt framlegg til vedtak.

FS - vedtak:

Radøy kommune set av kroner 50 000 til gjennomføring av nynorskdagar i 2017. Midlane vert henta frå disposisjonsfond merka nynorskmidlar.

Løyving til nynorskdagar i 2019 kjem opp som ei eiga sak i budsjettåret 2019.

Kommunestyret i Radøy - 004/2017

KS - handsaming:

Agnes Hoshovde Bernes (V) helsa nynorskdagane velkomen som eit "kultur" tiltak. Ho oppmoda kommunen til å inkludera ungdomsklubben og ungdomsrådet i dette prosjektet. Ho viste til at ein del ungdomar skiftar frå nynorsk til bokmål når dei kjem på vidaregåande skule.

Leif Taule (SP) ser det som viktig å styrka nynorsk språk i barnehagane, i tillegg til å bevisstgjera elevane i ungdomsskulen. Han viste til den vedtekne målbruksplanen og oppmoda rådmannen om å få større fokus på skriftleg språkbruk mellom leiarane i kommunen. Han ønskjer også å involvera lag og organisasjonar i nynorskdagane.

Taule sette fram følgjande tilleggsframlegg:

I samband med nynorskdagane i Radøy vert det i tillegg sett av kr 10 000,- som lag og organisasjonar søker midlar frå til aktuelle tiltak for å fremja nynorsken.

Midlane vert henta frå nynorskfondet.

Kommunestyret vedtok samrøystes formannskapet si tilråding, med tilleggsframlegg frå Leif Taule (SP) sett fram i møtet.

KS - vedtak:

Radøy kommune set av kroner 50 000 til gjennomføring av nynorskdagar i 2017. Midlane vert henta frå disposisjonsfond merka nynorskmidlar.

I samband med nynorskdagane i Radøy vert det i tillegg sett av kr 10 000,- som lag og organisasjonar søker midlar frå til aktuelle tiltak for å fremja nynorsken.

Midlane vert henta frå nynorskfondet.

Løyving til nynorskdagar i 2019 kjem opp som ei eiga sak i budsjettåret 2019.